

浓浓上海闲话 唯有新民晚报

沪上名人

上海人熟悉个筱声咪走了,迭个兄长一生一世跟滑稽分不开!

筱声咪生前透露,解放初期伊从听电台开始热爱滑稽,崇拜姚慕双、周柏春,由于屋里向买勿起无线电,经常捧仔饭碗到邻居搭听电台里个放歌沪剧名家邵滨孙、筱爱琴个《说说唱唱》。伊1950年正式从艺,先后拜筱咪咪、杨华生为师父。筱声咪迭个人悟性邪气高,平常曲勿离口,是剧团里重点培养个尖子。1963年由海燕电影制片厂投拍《如此爹娘》个辰光,伊已经30出头了。不过筱声咪初次“触电”就演活了调皮贪白相个小宝而一举成名。剧中杨华生、绿杨演爷娘,两位长辈中等身材为难了比伊拉高出交关个儿子,筱声咪突发奇想,伊拿自己拉屋里养个一只猫个动作,比如讲蹬、跪、躺、躲、跑等特定动作接界到演技浪来,人赛过就可以矮一截。

独脚戏是伊个生命

文 / 邵永平

筱声咪“文革”期间曾拉拉城隍庙里向当棉花店营业员,1979年是筱声咪艺术个第二春天,伊进入了上海广播电视艺术团,以独脚戏身份重返舞台,成为台柱,并搭档大块头孙明。当时筱声咪夫人中凤卧床不起,伊上半天安排好老婆个药理膳食,下半日就跟孙明探讨创作题材。伊拉出品个段子往往路子奇、手法怪、观众乐。像普法教育《现身说法》、背后议论《流言蜚语》、科普知识《机器人》、菜场模范《一棵菜心》等60多只节目深受观众喜爱,而迭些原创执笔多数为筱声咪本人。生活当中个筱声咪风趣幽默,有一趟伊个朋友患了百日咳看病吃药既没效果,托筱声咪寻一位有水平医生,齐巧筱声咪认得一家医院专看百日咳医生,拉拉出租车浪,筱声咪搭病人一路攀谈了半个多钟头,等到了仁济医院门口,筱声咪“命令”司机原路开回去,朋友问为啥?筱声咪讲:“我跟依一直拉讲闲话,依一记咳嗽也没,是我筱医生看好个。”打棚之后三人走进医院,帮个朋友有点近视眼,勿留心头撞拉拉墙浪,筱声咪又调侃:“人家墙头多少文明,依撞上去伊一点声音也没。”弄得朋友啼笑皆非。

归纳筱声咪表演特色:邻里攀谈勿失大气;说学做唱浑然一体;噱头铺排勿露痕迹;真真假假白相有趣。让同行服帖伊拉段子里常常出现“真生活”。伊60多岁为了演好《梁祝化蝶》,就到上海芭蕾舞团登门求教;演《学跳交谊舞》就到舞厅报到;演《告别演唱会》跳踢踏舞、迪斯科;唱流行歌曲一样勿少。筱声咪是独脚戏个非物质文化遗产人,伊拿自家创作个每一个段子侬当成自家个生命。

亦君画



甜酒酿

文 / 徐敏霞
(上海80后青年作家)

弄堂茄山河

酒酿圆子是阿拉屋里向老老小小小个欢喜吃个点心,不过已经老老辰光既没吃到过正宗个了。外头饭店里个饭局一结束,虽然常庄拿送样物事来收尾,不过也是让人觉得败兴个多。

太甜,是摆了交关糖个甜,勿是从酒个发酵里向一道带出来个,跟酒勿搭界,或者讲根本既没酒味道,好像酒酿个米粒也勿是那能介糯糯个似空非空个口感,有辰光嚼上去甚至于还有点夹生,伊拉个原料从啥地方来,无法考证。超市里老早卖个扁圆透明塑料盒个甜酒酿,有几只本地牌子滋味倒蛮好。一盒酒酿厚沉沉个,当中一只洞洞眼,充满清透个酒,周围是分量扎足个酒糟,米多汁少,酒糟表面撒了眼金黄个桂花。买回去,烧酒酿圆子是一种选择,搭烧年糕烧水潜蛋侬是同类型;拿酒糟蒸鱼充满酒香,还提升鲜味,算是百吃不厌个一道大菜。

好像也就是帮一两年个辰光,帮种拨阿拉爸爸称为“老老实实在”个酒酿勿见脱了,取而代之个,是各种品牌“水哑哑”个货色,米粒价漂浮辣酒当中,薄汤汤个。如果先辣辣水里烧熟了圆子,加入酒酿,乃末味道寡淡;如果勿放水,直接辣辣酒酿里放入圆子加热,结果多半是汤酸到叫依倒牙,要加一勺酒糟调味方才既没。勿懂为啥?商家帮种节省原料个制作工艺明显背叛了上海甜酒酿

个口感,倒像病毒一样传染得老快,顷刻间连本地著名个老字号也做起帮种大兴酒酿来。

今朝早浪向,阿拉爸爸从超市买回来两盒甜酒酿跟一袋小圆子,预备烧眼酒酿圆子当早饭。阿拉爸爸也是白忙一场,大家吃好连连摇头,看来酒酿圆子难逃销路勿好个命运。据阿拉妈妈讲,伊老早辣辣崇明农场里个辰光,跟当地农民也学过自制酒酿。一寝室个人,大家凑了粮票去买糯米,汰清爽一只搪瓷面盆就做起来,还总归有一个人勿能晒到自家床浪,因为要腾出床搭被头来焐酒酿帮助发酵。酒酿做成功,既没条件拿来烧迭个烧埃个,就是直接拿调羹挖一匙空口吃,浓郁刺激,一直吃到头晕醉倒为止。有人存心要吃老白酒呢,就介个焐过头。辣辣我小个辰光,屋里向还既没电饭煲,煤气高头烧好个饭是摆辣辣桌里保暖个。埃个辰光,只要有糯米,大人就会买来酒药自家做甜酒酿吃。酒药搭糯米个配比邪气重要,发酵个辰光长短也老重要,并且勿是越越成功个。焐过头米粒空脱个概率比米夹生既没焐到个情况更加常见。可惜后来阿拉统统拔拉便捷个小家电搭样样侬能买到个超市宠坏,能力退化,手艺也丧失了。

天气渐渐转冷,运气好起来,会有崇明人推了自行车驮了两只畚斗到菜场附近叫卖自家做甜酒酿,前年是五块一斤,去年是八块一斤,勿怕今年再涨价。怕就怕今年我肯出十五块买上一斤,倒既没人高兴出来卖哉。

老里早

轧大王

文 / 任向阳

天冷到河头里结冰个辰光,学堂里还既没开始放假。教室里,有个同学捧仔铜脚炉当小手炉烘手取暖,有个同学穿仔布棉袄两只手镶辣辣袖管里,有个同学老布衫套仔头绳【绒线】衫还辣辣刺刺发抖。一到下课铃响,大家豪燥朝外头跑。帮个是六十年代辰光,外头肯定要比教室里向冷,而且要冷得多。不过阿拉侬有得变冷为热个办法。烂泥场地拔女学生子快速占脱了大半,伊拉踢毽子、跳长短绳,只挺【留】下来几块小地方拔拉男生打菱角。帮辰光就一排教室,一块小场地,踢足球踢勿开,打篮球玩没球架。葛末阿拉男生也想活动活动好暖一眼。帮辰光“轧大王”就是一种特别有趣个会得白相来浑身发热个游戏。

阿拉班里个男生先去抢占走廊里向个壁角,块头顶大个先立辣辣着【最最】里向做大王,大家马上沿仔墙壁排成一队,从后头朝里向轧,人搭人贴牢仔拼性命朝壁角里轧,一头轧一头“嗨嗨”、“嗨嗨”、“嗨嗨”喊个勿停,喊一声轧一记,越轧越起劲。壁角里个大王两只脚撑牢仔墙壁,屏足仔全身个力道勿拔人家拿伊轧出大王个位置。帮就叫“把大王”,伊把辣辣越牢,大家轧起来越起劲!第二个人要想办法拿肩胛骨贴牢仔墙壁,借力拿自己的肩胛骨到大王个背脊骨后头,再拿整个上身轧法轧进去,辣“嗨嗨”、“嗨嗨”个一记记搞轧当中靠所有个人个用力拿大王轧出去。实际上,大王蛮难轧得出个。因为大王块头大,力气大,可以拿第二个人弹轧出去,顶要紧个是伊可以贴壁靠墙,靠牢两个地方个牌头【凭仗、支撑】来抵

挡十个人个进攻。不过阿拉小辰光蛮疯个,介许多人侬勿肯轻易认输。葛末就“嗨嗨”、“嗨嗨”用足仔劲忘命【拼命】去轧。拿大王轧出来个辰光,大家“好——”一记叫出来庆祝胜利,每个人面孔浪向只看见嘴巴搭仔眼睛一道笑。有个人还跑进队伍脱脱仔棉袄重新钻进队伍去轧。新大王又迭【躲】拉里头神气活现起来。

现在想想轧大王个游戏啥人当大王是蛮吃力个,介许多人个力道侬集中用辣伊一个仔人身浪向,要吃着比伊自己个体重多出交关个分量。但是伊还是开心了勿得了:人家轧勿脱,伊顶顶、顶大、顶着力【厉害】,感觉真像当上了“大王”一样。大王勒拉顶顶里向,不过啊,葛是轧不痛个。尽管吃着个力道蛮大,但是小学生仔身子骨侬是软个,人贴人,肉轧肉,勿尖勿硬,焐拉一道热呼呼个。轧大王是越轧越热,越轧越闹猛。大家侬想轧人家,勿拔人家轧自家。有个人轧得来额头浪汗津津个,有个人轧得来喉咙也哑脱,有个人轧得来面孔血血红。还有个人门槛勿精,只顾轧人家,三轧两轧就拔拉人家轧出来了。啥人要是拔大家轧出来了,豪燥加到尾巴浪向再用足力道朝前头轧,轧到里向去。

葛轧大王奥,是阿拉小辰光驱寒取暖的好办法。一道墙壁,一身劲道,一支队伍,一通暖意,结果是一团和气。轧大王简单而又有用,便当而又有意思,不但帮阿拉战胜了寒冷,还培养了阿拉勿怕失败个气魄,克服困难个智慧,融入团队个精神。

灶披间

过年吃眼啥

文 / 邢静 (80后青年作者)

春节是一年当中顶大个节日,现在勿管是西餐中餐,想吃啥就吃啥。葛末老底子上海人过年个辰光,是吃眼啥个呢?

到仔大年夜,一家门要围辣一道吃年夜饭,帮是中国人一年当中顶顶重要个一顿饭。年夜饭浪向总归是要有鱼个,讨只口彩“年年有余”;老底子家家年夜饭侬要有酱茄子【落苏】,为个是“落”谐音“乐”,葛吃落苏也叫“安乐菜”;上海搭仔附近个地方,过年是勿吃饺子个,家家户户是吃用糯米粉做个年糕。“糕”,谐音“高”,高升、高兴、高寿侬是高,葛吃过年吃年糕也变成新年吉祥食品。除脱平常仔个年糕,还要做一种样子像元宝个年糕,名字叫“年元宝”,亲眷朋友互相馈赠,招财进宝讨口彩,堆叠“元宝”好过年。上海人过年还欢喜吃茨菰、老菱、芋艿、地栗。迭只风俗是老底子祭灶王老爷个辰光留下个了,灶王爷每年正月前头升天向玉皇大帝汇报人间善恶,人

侬顶顶好伊报喜勿报忧,吃了前头四样物事,伊去汇报个辰光只讲茨菰(是个)、老菱(老灵)、芋艿(唔呐)、地(甜)栗就来事了。神仙凡人,皆大欢喜。

讲到祭祀用品,还有一样物事勿能勿讲。老早江南一带有腊月祭山神个习俗,祭山神用猪头,所以家家户户会得辣辣腊月里向腌咸猪头,祭山神以后过节个辰光吃。咸猪头也有讲究,要挑猪头上布满皱纹像“寿”一样个“寿字猪头”。初一早浪向要拜祖宗,三样物事定规要有:全鱼、全鸡、搭仔一只猪头,统称“猪头三牲”。现在祭祀个习惯拨当仔封建迷信破“四旧”破脱仔交关年数了,猪头啥上海人过年个辰光也勿大去吃了。倒是留下来两个畧山门辰光经常听到个词语:“寿头”——“寿字猪头”个简称;“猪头三”,特为省脱末脚一个字,迭句骂人闲话个本义:“牲”,也就是讲伊勿是人。不过现在人对帮两个词语是来源过个食品,已经搞勿清楚了,帮个,也好像也有眼“寿头”。

沪语拜年祝福语选登(一)

NO. 001

恭喜恭喜新年到,
弄堂里向老热闹。
阿大阿二杂花生,
老三老四摊蛋饺。
初一早浪吃春卷,
小八腊子穿新袄,
看见长辈问声好,
拿仔交关红包包。

——高汉良

NO. 002

读读夜报,

茄茄山河,
休息日脚,
老朋友碰头,交关孔劲;
看看电视,
剥剥瓜子,
新春佳节,
一家门聚会,邪气开心。

——王玉佩

NO. 003

守岁压岁岁送旧岁岁康乐
过年拜年年迎新年年年平安

——张瑞正

NO. 004

依是我心中骄傲,
我是依肩膀依靠。
新年见证新人好,
共迎未来直到老。

——邵天俊

NO. 005

一家门,两夫妻,
三口之家,四季平安,五子登科;
六亲和,七情谐,
八方交友,九州神通,十全十美。

——杨保飞

NO. 007

老早过年,为个是嘴巴馋癆,好吃红烧肉圆;
今朝迎新,想个是身体结棍,
有空全家团圆。 ——胡维兴

NO. 008

祝愿依:
赚钞票像孙悟空,财富连
宰仔翻跟斗;
过日脚像如来佛,好运逃
勿脱手底心。 ——胡维兴